

Iwwer de Ohrwurm

Neilich omm Stommdisch hott de Schorsch uff oomol gefroocht: Wer issen eichtlich die Frau Leutheusser-Schnarrenberger?

Doo gibt de Karl ze Antwort: Dess iss doch unser Bundesministerin von de Justiz. Warum, was hosde dann mett der, Schorsch?

Die Schorsch hott gegrinst. Eichtlich isses zum Lache. Moins wenn ich wach werr un n später beim Rasiern kimmt merr immer dere ihrn Nome in de Sinn. Vor drei Daach habb ich die Fraa in de Noochrichte gesehe, habb ihrn Nome geheert, un n weil der mir so seltsam vorkumme iss, habb ich den vor mich hie gebabbelt – un n seitdem iss der in moim Kopp drin un n geht nimmi eraus. Habt ihr aach schunn emol su ebbes gehabt?

Ich saach: Ja, su ebbes ähnliches, awwer dess war e Musikstick, so e gonz altes, ich habbs owends im Radio geheert un n ihr kennts all: „Es waren zwei Königskinder ...“ un n aach dess iss merr immer widder in de Sinn kumme, ess ging oofach nitt außem Kopp eraus, ich konnt mache was ich wollt.

De Karl hott genickt: Ich glaab, dess iss jedem von uns schunn bassiert, un n bei so Musikstickscher sächt merr, dess iss enn Ohrwurm. So enn Ohrwurm setzt sich fest un n bleibt e Zeitlong im Kopp. Un n beim Schorsch iss die Frau Minister soin Ohrwurm.

De Schorsch hott widder gegrinst, awwer e bissi gequält un n gesaat: Warum hott die aach so enn Nome, die kennt doch eichtlich nor ooner nemme, Leutheusser oder Schnarrenberger, awwer naa, zwaa Nome muss se hawwe.

De Karl hott gemoont: Mir wisse joo nitt wo die Fraa herkimmt, dort iss der oone Nome vielleicht genauso bekonnt wie der onnere, un n dess sinn sicher gute un n große Nome von gute un n große Familie, un n doo will merr, wenn merr heirate dut, nitt gern ooner defoo hergewwe. Ich kenn dess aach aus unserer Verwondschaft.

Jetzt habb ich gegrinst: Die Ministerin schreibt joo sicher vill un n von dem wasse saache dut werrd aach vill geschriwwe. Merr misst emol ausrechene losse, wie vill Bapier un n Druckerschwärz in oom oonzische Johr gespart werrn kennt, wenn deren ihrn Nome kerzer wär un n ...

De Schorsch hott mich unnerbroche. Mir wär liewer, ihr det mir saache, wie ich den Ohrwurm widder loskriehe konn. Honnes, wie hosden du dess gemacht mett dene Königskinner, wie bisden den los worm?

Ich saach: Ich waaß nitt mehr, awwer uff oomol warer fort. Ich waaß garnit, obs so Rezepte gibt nooch emm Motto: Wie man einen Ohrwurm verdrängt! – ess kennt soi.

De Karl hott gesaat: Doch, es gibt Vorschläch, wie merr enn Ohrwurm los kriecht: Mettem onnern Musikstick. Un n wenn dess nitt so bekonnt iss gibt's koon neie Ohrwurm.

De Schorsch war gonz traurich. No ja, awwer bei mir isses doch koo Musik nitt.

Trotzdem, saach ich, machs wie de Karl gesaat hott, nor dassde enn onnern Nome nimmst. Also zum Beispiel Frau Reißleiner-Witzemacher odder su ähnlich un n schunn iss die Frau Ministerin koon Ohrwurm mehr.

Drei Daach später rief de Schorsch mich oo: Honnes, ich habb tatsächlich die Frau Leutheusser-Schnarrenberger außem Kopp kriecht.

Ich ruf ins Telefon: Dess war doch enn gude Tipp von mir, odder?

Heer merr uff, hott de Schorsch geantwort, weil jetz werr ich mett de Frau Reißleiner-Witzemacher wach. Wie krieh ich dann die jetz außem Kopp?

Eiern Honnes